

增修
補註
正續歷代通鑑輯覽

清

聖祖仁皇帝

〔戊午〕康熙十七年春正月吳三桂下偽總兵董重民自廣東解至京師命赦之

江西巡撫佟國楨等敗逆賊韓大任于鷺鷥寨賊遁走汀州

詔舉博學鴻儒諭吏部自古一代之興必有博學鴻儒振起文運我朝崇

儒重道四海之廣豈無碩彥奇才可以追縱前喆者令在京三品以上及

科道官員在外督撫布按各舉所知于是大學士李蔚等薦原任副使道

曹溶

字潔躬浙江秀水人

等七十一人

將軍穆占遣兵敗賊于富茂灘復永寧縣

逆賊韓大任等詣康親王軍前投誠護軍統領哈堯山大破韓大任陳堯

元李茂珠等於老虎洞賊勢窮蹙詣康親王軍前投誠

二月金光祖自潯州進攻失利命將軍額楚都統勒貝等率兵守梧州將軍舒恕率兵守南雄兼顧韶州簡親王遣兵守贛州

傳宏烈告急命將軍額楚等速赴廣西與莽依圖傅宏烈合兵討賊

詔簡親王移師取湖南

丁卯皇后鈕祜祿氏崩諡孝昭

將軍莽依圖與吳三桂戰于平樂失利莽依圖退保中山鎮莽依圖等抵

平樂圍其城賊水陸來援巡撫傅宏烈都統王國棟率綠旗官兵與戰不

勝莽依圖兵退保中山鎮

命平南王尙之信都統馬九玉帥師赴廣西援剿莽依圖傅宏烈俱以平

樂之敗請罪宏烈並以兵少請濟師帝以賊衆我寡俱著免罪命尙之信

發精銳萬人多備火藥大礮速赴應援馬九玉率兵六千疾趨廣西併力

破賊

尋命尙之信守廣東停其親赴廣西

三月以鄭經等據玉州等寨分兵攻石碼江東橋

即虎渡橋在福建龍溪縣東

諸處命康親

王與郎廷相黃芳世協守漳泉海澄鄭經遣吳淑等于石碼城登岸副都

統孟安副將楊壯猷敗之

命將軍張勇移師駐甘州防守三邊

高雷總兵官祖澤清復叛

閏三月黃芳世敗蔡寅于天寶山

在福建龍溪縣西三十里

斬楊寧等三十六員

吳三桂親軍水師林興珠投誠命封侯爵授爲建義將軍

四川總督周有德等大敗賊衆于秦嶺恢復潼關

夏四月將軍穆占收復臨武藍山嘉禾桂陽桂東五縣

尙之信同副都統額赫納大敗逆賊祖澤清于電白澤清遁遂復高州尙

之信等自肇慶啟行于十一日抵電白斬祖逆僞總兵江瓊等十七日夜

城內原任雷協都司王得功投城祖澤清挈家屬遁去十九日復高州

五月海澄圍急命將軍賴塔提督石調聲統兵救援

海澄公黃芳世卒于軍贈少保諡忠襄以其弟總兵官黃芳泰襲封

貝子傅喇塔卒于軍諡惠獻初逆藩之變宿將已盡惟安親王傅貝子剿

流賊于川楚習戰陣故兩軍最立功浙閩傅貝子尤有紀律及卒鄭經復

連攻沿海郡邑事更棘于耿藩

傅宏烈同都統勒貝等復鬱林州

清直隸州今爲縣屬廣西蒼梧道

及北流興業陸川博白等

四縣

福建總督卽廷相提督段應舉俱以庸懦解任

以姚啓聖

字熙之
會稽人

爲福建總督吳興祚爲福建巡撫江寧提督楊捷加少保

兼太子太保調補福建

以炎暑命清理刑獄

噶爾丹興兵攻西海飭備邊防

先是厄魯特濟農遣人至甘肅提督張勇

所言我祖顧實汗以來職貢不絕今爲噶爾丹所敗窮迫來此欲赴西海
往會我叔達賴台吉兄墨爾根台吉若由邊外繞出則行月餘中途數日
乏水如由內地行則限于主上邊境不敢徑度請由內地過邊張勇以由
水泉出邊竟日可到墨爾根台吉處五日可到達賴台吉處奏請令由水
泉過邊允之至是濟農以布隆吉爾地方見有火光探聞噶爾丹追兵已
迫竟由雙井闌入內地提督孫思克奏請率兵逐之得旨驅逐濟農等過
邊加意防護

吳三桂稱帝于衡州僞號周改元昭武

時三桂年六十七矣失陝西閩粵

三大援已而又失江西清兵雲集湖湘間疆宇日蹙乃思竊帝號以自娛
其下亦爭勸進遂卽位改元昭武僞號周自長沙徙都衡州改衡州爲定
天府置百官封諸將造新曆舉雲貴鄉試以號召遠近殿瓦不及易黃以

漆髹之構廬舍萬間爲朝房適大風雨潦草成禮而罷

六月調尙之信鎮守韶州

鄭經攻海澄總兵官黃藍馳書告急黃藍奏海賊四路攻海澄城外木柵礮臺俱陷賊復從高埠瞰城中火攻不絕臣恐援兵稍遲則海澄難保得旨著康親王速檄將軍賴塔喇哈達等赴援密遺書副都統伯穆赫林總兵官黃藍如有隙可乘卽率兵棄城突出來會漳州大軍

湖廣兵擊敗三桂舟師于君山貝勒尙善等將烏船沙船分撥進湖泊柳林觜君山二處賊見之乘風齊來官兵分道迎擊守備陳勞等在君山看守火藥船見賊與官軍對敵卽率兵迎殺禽斬甚衆

三桂寇永興都統伯宜理布護軍統領哈堯山與戰失利死之賊遂據河外營

三桂率賊衆力攻郴州前鋒統領碩岱與戰失利退保永興

秋七月鄭經攻取海澄長泰二縣署前鋒統領希佛戰歿海澄糧盡黃藍

等委城突出海澄遂陷

三桂率賊衆渡河廣西巡撫傅宏烈與戰失利退守鬱林三桂調各路賊

兵數萬渡河與官兵對壘。傳宏烈屢請援師，竟無應者。遂敗退守鬱林。鄭經遣劉國軒等攻泉州，詔副都統岳爾多馬思文率師赴援。劉國軒等攻取同安，乘勝水陸攻泉州。因命岳爾多馬思文率師赴福建應援。詔修高家堰。河道總督靳輔奏：高家堰高良澗一帶，因水沒隄根，隄身單薄，必須加築戢隄一道，方爲萬全。從之。

授尙之孝宣義將軍，暫駐江西南昌。先是尙之信奏請調尙之孝赴京，帝允之。孝至京，給一品頂帶，食正一品俸。已而之孝請募兵效力以報國恩，得旨授宣義將軍，暫駐江西南昌，聽募兵三千募足，赴簡親王軍前征剿逆賊。

官兵敗三桂之衆于岳陽湖及柳林營。

八月，西洋國王阿豐素遣使進表貢獅子。表文曰：謹奏請大清皇帝萬安。

前次所遣使臣瑪訥撤爾達聶叨蒙皇帝德恩同去之員，俱沾柔遠之恩，聞之不勝懽忭。時時感激隆眷，仰巍巍大清國寵光，因諭凡在西洋所屬，永懷尊敬大清國之心，祝萬壽無疆，俾諸國永遠沾恩。等日月之無窮。今特遣本多白壘拉齋獻獅子。天主降生一千六百七十四年三月十七日。

奏

安遠靖寇大將軍貝勒尙善卒于軍。命貝勒察尼代之。尙善于四月初四日卒。至是始由貝子章泰以聞。命察尼代爲安遠靖寇大將軍。赴岳州統其軍。

吳三桂死。其孫世璠據滇南僭號。永興爲衡州門戶。相距僅百餘里。三桂

乃遣馬寶、王緒、胡國柱等悉銳環攻。晝夜不息。都統伊里布、副都統哈克

山相繼戰歿。統領碩岱等入城死守。河外營壘悉爲賊據。簡親王喇布屯

茶陵

清州、今爲縣。屬湘江道。

不敢救。穆占在郴州遣兵來援。亦不敢進。城壞于礮。囊土

補之。且築且戰。近二十日。城垂破。而三桂暴卒。諸將解圍赴衡州。其孫世

璠自雲南至。始發喪。改元洪化。擁樞歸滇。初十四年。陝甘之變。四方響應。

帝欲親統軍駐荊州。廷臣以京師根本重地。固請毋行。及三桂僭號。帝以

諸將師久無功。復議親征。會三桂死。乃止。

治理曆法。南懷仁進康熙永年曆。康熙永年曆係接湯若望所推曆法。禮

部請著欽天監官生肄習。永遠遵行。從之。

九月。官兵復漳平縣。

署副都統禪布等復惠安縣解泉州圍

福建官兵敗劉國軒于白鴿嶺

在廈門道永春縣西南

復永春德化等縣國軒遁追敗之

于赤灣諸處

授平南王尙之信爲奮武大將軍統兵赴永興郴州諸處 三桂死永興賊

遁命尙之信統兵赴永興郴州諸處會同簡親王等以圖進取

冬十月命戶部尙書伊桑阿等查勘蕭碭河工 碭山縣石將軍廟及蕭縣

九里溝二處本年七月河水衝決又靳輔請銀二百五十萬兩修河動工

已九月未知工程如河命伊桑阿及侍郎田六善同往查勘

丁酉皇子允禔生 卽世宗帝之第十一子也母曰吳雅氏

十一月揚威大將軍簡親王喇布移師進取郴州

十二月廣西賊陷藤縣徧梧州命尙之信改赴梧州應援

撫遠大將軍圖海請赴京面奏事宜允之以吳丹代統其軍

〔己未〕十八年春正月貝勒察尼等圍岳州吳應麒棄城遁遂復岳州 初

岳州之糧取給于常德而圍師守君山不能斷其餉道降將林興珠獻策請以舟師分泊香蛇峽諸處並立營于九貢山以斷長沙衡州之路由是

水陸之圍始密敵將杜輝遣人約降事泄爲吳應麒絞死城中糧日竭僞總兵王度冲僞將軍陳珀等各以其舟師降應麒棄城遁遂復岳州

賊棄長沙遁安親王軍遂收復其城 正月二十九日賊聞岳州恢復棄長

沙遁官軍遂入城安撫

二月吳世琮犯梧州將軍傅宏烈莽依圖等大敗之賊棄營遁

官兵復湘陰華容石門湘潭桃源安鄉諸縣

寧南大將軍勒爾錦遣兵分剿松滋枝江宜都諸縣及澧州以次恢復 勒

爾錦聞岳州賊潰遣署副都統多莫克圖等渡江太平街虎渡口

在湖北江陵縣西南

諸賊皆潰遁前隊官兵進剿松滋枝江宜都諸縣及澧州

清直隸州今爲縣屬武陵道

以

次恢復守百里洲僞將洪福率舟師降

撫遠大將軍圖海仍赴陝西

順承郡王勒爾錦遣兵復常德府 勒爾錦抵澧州遣貝子準達等進取常

德未至賊先焚城中廬舍並江中船艦而遁僞按察使陳寶鑰等迎降官

兵于十八日入常德府

簡親王喇布遣兵復衡州府 喇布遣兵取衡州甫抵城下署前鋒參領戴

屯等奪門入城逆賊吳國貴夏國相等驚遁遂復府城

復設廣西提督

三月試內外薦舉博學鴻儒于體仁閣薦舉一百四十三人旋取一等彭

孫適

字駿孫海鹽人

等二十人二等李來泰

字石臺臨川人

等三十人俱授翰林官纂修

明史

試題鑄璣玉衡賦省耕詩五言排律二十韻

寧南將軍勒爾錦遣兵復興山歸州巴東諸城

將軍穆占等復常寧新田二縣

將軍穆占復永州于是道州

今爲縣屬湖南衡陽道

永明江華東安等縣賊俱棄城遁

湖南提督趙賴復寶慶府

提督侯錫爵大敗楊金目于山頭仔

金光祖奏潮州濱海賊艘出沒臣遣

提督侯錫爵大敗海賊楊金目于山頭仔斬千餘級燒船二百餘隻

夏四月以楊茂勳爲四川總督

詔清理刑獄

調萬正色爲福建水師總兵官加太子少保旋授爲福建水師提督統轄全

閩水軍湖廣岳州水師總兵官萬正色奏閩海情形水陸戰守機宜帝以

萬正色閩人稔知水性今岳州長沙悉已恢復無須水師調爲福建水師總兵官又以剿寇洞庭著有勞績從優加太子少保旋授爲福建水師提督統轄全軍水師營務

官兵復潯州府 吳世琮踞潯州府聞官兵至卽焚營遁副將林大忠入城撫定人民

將軍穆占遣兵復灌陽興安全州等城

命順承郡王勒爾錦還荊州與巴爾希等進定歸州巴東

五月劉國軒攻江東橋將軍賴塔擊走之

詔內閣學士徐元文掌院學士葉方藹右庶子張玉書等修明史

命麻勒吉統兵守桂林 莽依圖奏請調兵駐桂林俟副都統額赫納兵至

貴縣卽前赴橫州以絕柳州南寧之路帝命簡親王及穆占等撥兵赴麻

勒吉所令統轄鎮守桂林

六月以安世鼎爲江西巡撫巴錫爲甘肅巡撫

詔大將軍圖海與各路將軍亟殲寶雞賊恢復漢興以平蜀 時湖南賊已

大敗困蹙遁走安親王簡親王等三路進發平定武岡新寧諸處剿殺賊

寇貝勒蔡尼等進取辰州順承郡王及將軍噶爾漢等亦從鄖陽彝陵規定蜀賊又馬承蔭郭義等並皆薙髮投誠命圖海與將軍總督提督等亟殲寶雞之賊恢復漢中興安以平蜀地

是夏廣西湖南平

秋七月淮陽瞿家壩工成

河道總督靳輔奏淮河東岸自瞿家壩至周橋

閘乃淮揚運河上游門戶

山鹽山陽鹽城二縣清俱屬淮安府山陽今爲淮安縣

等七州縣民生關鍵

也當黃河循禹故道之時淮流安瀾直下此地未聞水患迨黃流南徙奪

淮淮流不能暢注于是壅遏四漫山陽寶應高郵

清州今爲縣屬淮揚道

江都四州縣

河西低窪之區盡成澤國者六百餘年矣明萬曆初河道廢壞雖不若今

日之甚而清口淤高堰決與今日情形相似彼時河臣潘季馴築隄堵口

治效班班可考然此處不議加高蓋明代祖陵在西故停河東之障以洩

水殊不知如慮淮漲西侵何難兩岸並築而顧留患門庭歷年既久遂致

成河九道使淮揚疊受災計瞿家壩成河九道之處共寬一千三百二十

三丈二尺今已合龍更查山陽寶應高郵江都四州縣河西諸湖亦逐漸

涸出擬設法招墾庶幾增賦足民

將軍莽依圖覺羅舒恕額楚總兵譚昇楊國泰敗吳世琮于南寧之西山世琮負創遁吳世琮圍南寧日久城中食盡旦夕且陷馬承蔭請救總督金光祖遣總兵官譚昇楊國泰往援世琮率衆渡江越嶺于新村西山之巔列鹿角逆戰莽依圖覺羅舒恕額楚都統勒貝等分路撲剿世琮負傷以數十騎遁南寧圍解

命莽依圖速調都統希佛自南寧取路入滇

八月廣西巡撫傅宏烈遣兵恢復柳城融縣桂柳路通

以施維翰

字及甫上海人

爲山東巡撫

將軍穆占復新寧縣與安親王岳樂進剿武岡

穆占既復新寧賊走武岡

命簡親王安親王等速克武岡楓木嶺

楓木嶺關在湖南新寧縣東

諸處以定靖沅由鎮

遠進平雲貴

將軍林興珠提督趙國祚貝子章泰等復武岡及楓木嶺

九月浙江巡撫陳秉直以察吏無能解任以李本晟爲浙江巡撫

命簡親王喇布率師守桂林將軍莽依圖進師雲南

以南旺夏鎮北河分司分管諸務俱歸濟寧道兼轄

從河道總督靳輔請

也。

命械送祖清澤來京。兩廣總督金光祖禽獲祖澤清，並其子祖良梗，帝以

澤清屢叛，命械送伊父子及家人來京。

冬十月，定錢制。

每文重一錢四分。

戶部等議：錢法十二條，一、順治錢初重一錢，復改一錢二分五釐，又改一錢四分。今仍鑄一錢四分，行使。

二、將兩淮兩浙長蘆河東鹽課銀，俱交見出差御史督各運司官照部定價買銅解送，三、關差官員所辦銅斤，不許解送毀化板塊之銅，以免毀錢之弊，四、關差官員買銅，應選殷實老成人役，五、

寶泉寶源二局鑄頭匠役，包攬買交者，枷責，官員徇庇者，革職，六、各關官員差滿所欠銅斤，立限不完者，革職，變產追還，七、令滿漢侍郎親領監督等公同秤收發鑄，八、一切有銅及白黑鉛處所，

有民具呈顯探，該督撫即選員監探，九、民間必用銅器，五斤以下者，仍許造賣外，其非必用者，嚴禁製造，十、化錢爲銅，除已禁外，定鼓勵擊獲之例，十一、頒發制錢式樣，令各省巡撫鼓鑄，十二、召

灰人淘取寶泉寶源二局土砂煤炭，灰內滴漏之銅，定價收買，從之。

敕諭各路將軍招撫吳應麒、胡國柱、夏國相、王屏藩、馬寶、郭壯圖等。諭大

學士等：吳應麒、夏國相等俱吳三桂族戚，同謀叛逆，本非脅從。今招撫敕

書中若加脅從等字，反令生疑，不如聲明其罪，許以革面歸誠。王者之言

昭如星日，一以至誠相感，庶可招徠遠人。若王屏藩傾心向化，則西蜀不

血刃而定矣。

提督王進寶敗賊于利橋，紅花鋪諸處復鳳縣，兩當縣。

河督靳輔請另開運河于駱馬湖之旁，從之。

陝西提督趙良棟敗賊于密樹關賊遁遂復徽州

今爲縣屬甘肅渭源道

十一月封鄂爾多斯多羅郡王古魯爲和碩親王以撫降神木縣功也

平涼提督王進寶入雞頭關

在漢中道褒城縣北

賊將王屏藩走廣元遂復漢中府

安南國王黎惟禎遣使貢賀

黎維禎奏言逆賊吳三桂變亂數年阻臣國

入貢之路又多方脅誘臣不敢從乃有逆臣莫元清背恩從賊與吳三桂

密相締結領兵潛入臣國高平圖爲掩襲臣今謹修貢儀遣陪臣朝賀一

面遣兵禽追逆黨莫元清明正其罪得旨該王不肯從逆今又慶賀進貢

著禮部照安南國王進貢舊例遵行至追禽莫元清應無庸議

十二月以蔡毓榮爲綏遠將軍進定雲貴

授蔡毓榮爲綏遠將軍總督常

德武岡等處所有各省調撥官兵及湖廣全省綠旗兵馬俱聽調度總督

董衛國周有德提督桑峨趙賴周卜世等俱聽節制

大將軍圖海遣兵復梁河關僞將軍韓晉卿遁入四川遂復興安州平利紫

陽石泉漢陰洵陽白河諸縣及湖廣竹山竹谿上津等縣以次底定

命傅宏烈帥師赴滇黔以麻勒吉署廣西巡撫

以譚宏之叛或由迫脅令其姪前副將譚天敘齎敕往撫

〔庚申〕十九年春正月陝西提督趙良棟連敗賊衆于白水壩等處復龍安府趙良棟率兵從白水壩浮水渡江擊賊大敗之追至青川

在四川平武縣東

石峽

溝復敗其伏兵龍安府僞總兵姜應熊等降遂復龍安府

趙良棟率兵復成都

良棟率兵自龍安進剿追至舊州明月江賊斷橋守

江良棟督兵浮水渡江擊賊令總兵官王進才分兩路進取成都而親率大兵繼進至綿竹僞勁武將軍汪文元迎降至成都二十里鋪僞巡撫張文德等率文武僞官二百餘人迎降遂復成都

提督王進寶復保寧

進寶既復朝天關廣元縣遂分三路趣保寧去城二

十里據孔道而軍賊二萬餘來攻進寶大敗之追剿至錦屏山

在四川閬中縣南三里

破賊四壘賊退保橋官兵又擊之奪橋斬關入城賊渠王屏藩僞將軍陳

君極自經死生禽僞將軍吳之茂張起龍僞總兵郭天春等十七員遂復

保寧

以趙良棟爲雲南貴州總督加兵部尙書銜仍兼管勇略將軍事務

二月詔順承郡王勒爾錦貝子準達都統范達禮等率兵取重慶將軍吳丹鄂爾濟哈與趙良棟等取雲貴總督楊茂勳提督王之鼎守成都王進寶守